

- प्रधानमंत्री नरेंद्र मोदी कह्यो— केंद्र सरकार घुमंतू जनजातियां अर समुदायां रा विकास सारू लगातार काम कर रही है।
- राज्यपाल हरिभाऊ बागडे कुदरती तरीका ऊं खेती करण माथे जोर दीनो।
- प्रदेश मांय दिसम्बर महीना मांय व्हेवण वाळी राइजिंग राजस्थान ग्लोबल इन्वेस्टमेंट समिट री तैयारियां जोरां ऊं चाल रही है।
- वरिष्ठ नागरिक तीर्थ यात्रा योजना रा तहत आज पाली ऊं भारत गौरव ट्रेन रवाना व्ही।

000

प्रधानमंत्री नरेंद्र मोदी कह्यो है के केंद्र सरकार घुमंतू जनजातियां अर समुदायां रो विकास करणो तैय कीनो है। प्रधानमंत्री कह्यो के सरकार रो हर फैसलो अर नीति विकसित भारत ने समर्पित है, अर किसान ई नजरिया रो खास आधार है। प्रधानमंत्री आज महाराष्ट्र रा वाशिम ऊं पीएम-किसान योजना री 18वीं किस्त जारी कीनी। ई मौके वे कह्यो के ई योजना रा तैत देश भर मांय नौ करोड़ चार लाख ऊं बत्ता किसानां रा खातां मांय 20 हजार करोड़ रुपया ऊं बत्ती रकम सीधी भेजी ज्यी है। ई मौके केंद्रीय कृषि मंत्री शिवराज सिंह चौहान अर महाराष्ट्र रा मुख्यमंत्री एकनाथ शिंदे समेत केई मान्योड़ा लोग मौजूद हा। प्रधानमंत्री बंजारा समुदाय रा विरासत संग्रहालय रो उद्घाटन ई कीनो। चार मंजिल रा ई संग्रहालय री 13 दीर्घावां मांय बंजारा आंदोलन रा फोटुआं रे मार्फत बंजारा विरासत रो दरसाव करी ज्यो है।

000

राज्यपाल हरिभाऊ बागडे किसानां ऊं कुदरती तरीका ऊं खेती करण बाबत् कह्यो है। वे आज सीकर जिला रा खाटूश्याम जी मांय बजाज फाउंडेशन कानी ऊं राख्यी ज्यी सुभाष पालेकर कृषि कार्यशाला मांय बोल रह्या हा। वे रसायन रहित खेती सागे कम ती कम खर्च , बत्ती उपज, उच्च गुणवत्ता अर साफ पर्यावरण सारू कुदरती तरीका ऊं खेती करण माथे जोर दीनो। राज्यपाल पाणी बचावण माथे खास ध्यान देवण बाबत् ई कह्यो। राज्यपाल किसानां सागे उन्नत खेती रा बारा मांय बातचीत कीनी। 6 अक्टूबर ताई चालण वाळा ई शिविर मांय देश रा 13 राज्यां रा करीब 1 हजार प्रगतिशील किसान सिरकत कर रह्या है।

000

राज्यपाल हरिभाऊ बागडे आज सीकर जिला रा खाटूश्यामजी मंदिर मांय दर्शन कीना। राज्यपाल दर्शन पाछे मंदिर परिसर रो दौरा कीनो अर मंदिर रा विकास रा बारा मांय मंदिर कमेटी रा ओहदादारां सागे बातचीत कीनी।

000

केन्द्र सरकार री बजट घोषणा रा तैत “100 सिटीज प्रोग्राम” रा बारा मांय जयपुर मांय कार्यशाला राख्यी ज्यी। इण मांय केन्द्र अर राज्य सरकार, एशियाई विकास बैंक अर विश्व बैंक रा अहलकार, नीति निर्माता अर विशेषज्ञ सिरकत कीनी। ई दौरान शहरी पेयजल आपूर्ति, सीवरेज अर ठोस कचरा प्रबंधन रा हलका मांय मौजूदा हालात, बेस्ट प्रैक्टिसेज अर आवण वाळी चुनौतियां रा बारा मांय विगतवार चर्चा करी ज्यी। कार्यशाला मांय केन्द्र सरकार रा आवास अर शहरी मामलात मंत्रालय, राज्य सरकार रा स्वायत्त शासन विभाग, जयपुर, जोधपुर अर अजमेर नगर निकायां रा आला अहलकार अर विषय विशेषज्ञ सिरकत कीनी। कार्यशाला मांय स्वायत्त शासन विभाग रा प्रमुख शासन सचिव राजेश यादव प्रदेश मांय पाणी री पूर्ति अर सीवरेज व्यवस्था बणावण मांय एशियाई विकास बैंक रा योगदान ने खास बतायो। वे कह्यो के बधता शहरीकरण रे कारण अरबन प्लानिंग एक चुनौतीपूर्ण काम है जिण मांय जमीं रा अंदर अर जमीन रे ऊपर खूब आधारभूत विकास रा काम करणा पड़े है। केन्द्र सरकार रा आवास अर शहरी मामलात मंत्रालय रा ज्वाईंट एडवाइजर वी.के.चौरसिया “100 सिटीज प्रोग्राम” री विगतवार जाणकारी दीनी।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी जा रही है। इण मांय आज पेश है सरकारी ई-बाजार जेम रा बारा मांय जाणकारी —

000

राइजिंग राजस्थान ग्लोबल इन्वेस्टमेंट समिट री तैयारियां रो जायजो लेवण सारू जयपुर ग्रेटर नगर निगम की आयुक्त, रुक्मणी रियार आज इण ऊं जुड़ी ठौड़ां रो दौरा कीनो। निगम आयुक्त सांगानेर हवाई अड्डा ऊं बाईस गोदाम ताई रा गेला देख्या। रुक्मणी रियार शहर री साफ-सफाई री जरूरत माथे जोर देता थकां संबंधित अहलकारां ने जरूरी हुकम दीना।

000

लोकसभा अध्यक्ष ओम बिरला कह्यो है के ग्राम सेवा सहकारी समितियां सहयोग री भावना रे मार्फत समाज अर राष्ट्र निर्माण मांय खास काम करे है। वे आज कोटा मांय बोरखेड़ा ग्राम सेवा सहकारी समिति री आम सभा मांय बोल रह्या हा। बिरला कह्यो के सहकारिता आंदोलन मांय संस्थावां सहकारिता ऊं समृद्धि रो गेलो बतावे है जिण ऊं खुद रे पाण ऊबा व्हेवण री भावना ने बधावो मिले है। वे महिलावां ऊं सहकारी समितियां री मदद ऊं नान्हा उद्योग लगा र खुद रे पाण ऊबी व्हेवण री अरज कीनी।

000000

सिरोही जिला मांय आबूरोड़ रा ब्रह्मकुमारी संस्थान मांय चाल रह्या वैश्विक शिखर सम्मेलन रा दूजा दिन आज वसुधैव कुटुम्बकम् मुद्दा माथे सम्मेलन राख्यी ज्यो। कार्यक्रम मांय उत्तराखंड रा मुख्यमंत्री पुष्कर सिंह धामी, रेल राज्यमंत्री रवनीत सिंह बिट्टू अर सांसद रविकिशन ई मौजूद रह्या। ई मौके सम्मेलन रा खास पावणा उत्तराखंड रा मुख्यमंत्री पुष्कर सिंह धामी कह्यो के वसुधैव कुटुम्बकम् भारत रा जीवन दर्शन रो सार है।

000

संस्कृत अर प्राकृत भाषा रा विद्वान प्रो. धर्म चंद जैन प्राकृत समेत पांच भाषावां ने शास्त्रीय भाषा रो दर्जो देवण रा केंद्रीय मंत्रिमंडल रा फैसला रो स्वागत कीनो है। वे कह्यो के प्राकृत भाषा जूनी भाषा रही है अर इण मांय केई ग्रंथ रची ज्यो है। प्रो. जैन कह्यो के ई फैसला ऊं प्राकृत भाषा रा जाणकारां ने बधावो मिलेला अर प्राकृत भाषा मांय रची ज्यो ग्रंथां रा दूजी भाषावां मांय अनुवाद ने बधावो मिलेला अर नुवी रचनावां गढ़ी जा सकेला। वे कह्यो के ई फैसला ऊं प्राकृत भाषा मांय रची ज्यो रचनावां ई सामी आवेला।

000

वरिष्ठ नागरिक तीर्थ योजना रा तहत आज पाली ऊं भारत गौरव ट्रेन रवाना व्ही। देवस्थान विभाग मंत्री जोराराम कुमावत इण ने हरी झंडी बता र रवाना कीनी। आ गाडी जातरूआं ने अयोध्या, हरिद्वार अर ऋषिकेश री यात्रा करावेला। कुमावत बतायो के वरिष्ठ नागरिकां री तीर्थ यात्रा सारू आ रेलगाडी पाली ऊं पैली दफा रवाना व्ही है।

0000